

《佛說未曾有經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 16, No. 688

No. 688 [No. 689]

佛說未曾有經

後漢失譯人名出古舊錄

如是我聞。一時佛住王舍城耆闍崛山。與大比丘眾千二百五十人俱。爾時尊者阿難。晨朝著衣持鉢入王舍城正念乞食。見有一處新作大舍重閣高顯。戶牖彫飾牆壁嚴整。無有風塵障隔寒暑。尊者阿難。見已即作是念。若有善男子善女人。作如是嚴麗之舍布施四方眾僧。若如來般涅槃後。復有善男子善女人。以如芥子舍利起塔大如菴摩勒果。其剎如針。上施槃蓋如酸棗葉。若作佛像乃至如麩麥。是二功德何者為多

爾時尊者阿難。乞食訖還本處。飯食竟舉衣鉢。洗足已往詣佛所。一心恭敬頭面作禮。於一面坐已白佛言世尊。我於彼處晨朝著衣持鉢入王舍城乞食見有一處新作大舍重閣高顯。戶牖彫飾牆壁嚴整。無有風塵障隔寒暑。便作是念。若有善男子善女人。能作如是妙麗之舍。布施四方眾僧。若佛般涅槃後復有善男子善女人。以如芥子舍利起塔。大如菴摩勒果。其剎如針。上施槃蓋如酸棗葉。若作佛像乃至如麩麥。是二功德何者為多

爾時世尊告阿難言。善哉善哉。阿難。汝為多人故。為安樂眾生故。為哀愍世間故。為大眾故。為多饒益天人故。乃以是義問於如來。阿難諦聽善思念之。閻浮提地廣七千由延北闊南狹。其中人面似如車形。如是地上滿中甘蔗竹葦稻麻叢林。無空缺處猶如一體。阿難。是諸草木皆悉為人。得須陀洹斯陀含阿那含阿羅漢辟支佛。若有一人盡壽供養衣鉢飲食床座醫藥房舍所須具足供給至滅度後一一起塔。各起塔已供養恭敬。香華伎樂燒香塗香末香幢幡寶蓋如是具足於汝意云何。如此功德寧為多不。阿難白佛言。甚多世尊。甚多善逝。是善男子善女人得大功德。佛告阿難。置是閻浮提。復有瞿耶尼廣八千由延。人面如半月。於彼中人亦復如是作大功德。復次阿難。置是瞿耶尼。復有弗于逮廣九千由延。人面圓滿。於彼人中悉亦如是作大功德。復次阿難。置是弗于逮。復有鬱單越廣萬由延。人面正方。於彼中人悉亦如是作大功德。佛告阿難。釋提桓因大莊嚴殿。彫文刻鏤微妙奇特。有八萬四千寶柱。以天青琉璃間廁黃金。以為羅網彌覆其上。金沙布地奇妙栴檀以為欄楯。復次阿難。是天帝釋大莊嚴殿。復有八萬四千寶窓。亦以天青琉璃間廁黃金。以為羅網彌覆其上。布以金沙栴檀欄楯。復次阿難。是天帝釋大莊嚴殿。復有八萬四千天紺寶窓。微妙嚴麗校飾如上。復次阿難。是天帝釋大莊嚴殿。復有八萬四千樓櫓館閣四出圍繞眾寶校飾亦復如上。佛告阿難。若有善男子善女人。作是天帝釋大莊嚴殿。施四方眾僧。於汝意云何。是

善男子善女人。以此因緣得大功德不。阿難白佛言。甚多世尊。甚多善逝。此善男子善女人得大功德

佛告阿難。置此四天下功德。復置釋提桓因大莊嚴殿功德。若有善男子善女人。作百千億釋提桓因大莊嚴殿。施四方僧。復有善男子善女人。於佛般涅槃後。以如芥子舍利起塔。大如菴摩勒果。其剎如針。上施槃蓋如酸棗葉。若造佛形像乃至如麩麥。此功德滿足百倍不及。千倍萬倍百千萬億倍所不能及。不可稱量。阿難當知。是如來無量功德。戒分定分智慧分解脫分知見解脫分。復次阿難。如來無量功德。有大神通神足變化及檀波羅蜜尸波羅蜜羸提波羅蜜毘梨耶波羅蜜禪波羅蜜般若波羅蜜如是等無量功德

爾時佛告尊者阿難。汝諦受持此經。阿難白佛言。受教世尊。此名何法。我等如來法中當云何受持。佛告阿難。此名未曾有法。是一切清淨妙法方便。我以是故慇懃囑汝當數數廣。為諸天人阿修羅龍夜叉乾闥婆伽留羅緊那羅摩睺羅伽人非人等。分別說之。當作如來善根功德種子。一切眾生聞者。得入如來善根功德。以是因緣故離諸煩惱悉皆成佛。諸比丘聞已歡喜作禮

藥王佛 藥王菩薩 藥上菩薩 最上天王佛